

# Persidangan tingkat atlit Sukma

Oleh Aida Adilah Mat  
(Pelatih UiTM)

TARAF atlit di Sukan Malaysia (Sukma) diharap dapat ditingkatkan ke tahap lebih tinggi apabila semua pihak yang terlibat secara langsung berpeluang berkongsi pengetahuan dan pengalaman dalam Persidangan Sukma Peringkat Kebangsaan pertama di Kolej Inti di Bandar Baru Nilai, Negeri Sembilan 22-23 Mei depan.

Persidangan itu yang bertemakan 'Merapatkan Jurang di antara Penyelidik dan Pengamal' membabitkan penyertaan penyelidik, tokoh akademik, tokoh sukan, jurulatih dan pengurus pasukan. Hasil kajian akan

dikongsi bersama bagi meningkatkan mutu sukan negara ke tahap antarabangsa.

Antara fokus topik yang akan dibincangkan adalah pembangunan dan cabaran dalam sukan di negara ini, masalah aspek pengurusan sukan serta aspek saintifik prestasi atlit dan peranan serta cabaran sukan dalam institusi pendidikan.

Antara panel yang dijemput bagi persidangan itu ialah Pengarah Institut Sukan Negara, Dr Ramlan Aziz, Timbalan Presiden Majlis Olimpik Malaysia (MOM), Datuk Dr M Jegathesan dan Pengarah Pusat Sukan Universiti Malaya, Profesor Emeritus Datuk Dr Khoo Kay Kim.

Pengerusi Jawatankuasa Persidangan, Dr Sia Ah Hiock dalam

sidang media semalam berkata, seperti menjelang sukan bertaraf antarabangsa lain, Sukma juga perlu menganjurkan satu persidangan khas sebelum berlangsungnya temasya dwitahunan itu bagi membantu pihak yang terlibat merenung semula pencapaian dan tahap sukan negara.

"Ia juga dapat membantu kita dengan lebih berkesan menggunakan sumber yang ada bagi melepasi tembok penghalang supaya kita dapat mencapai kecemerlangan dalam sukan," kata Dr Sia.

Sementara itu, Dr Khoo ketika ditemui berkata, Sukma adalah pentas yang baik bagi mencungkil bakat baru dan pelapis negara dalam bidang sukan

yang berpotensi untuk lebih berjaya di masa depan.

Begitupun, katanya, penguurusan kerjaya seseorang atlit muda sering kali dipandang ringan menyebabkan ramai atlit berpotensi mudah berpuas hati dengan kejayaan awal di Sukma dan tidak meneruskan karier di peringkat lebih tinggi.

Yuran sebanyak RM150 dikenakan, bagi peserta yang mendaftar awal bagi mengikuti persidangan itu manakala hanya RM100 dikenakan bagi pelajar. Tarikh tutup penyertaan ialah pada 16 April. Mereka yang berminat boleh menghubungi Lim Boon Hooi (06-7982100) atau Kay Tec (06-7982000) atau melayari laman web [www.inti.edu.my](http://www.inti.edu.my)